



UKA 2021/50

27/10-2021

Jens-Frederik Nielsen

**Illup sananeqarneranut akiusup minnerpaaffissaata inatsisitigut aalajangersarneqartup
appartinneqarneratigut pisortat inissiaataanni attartortittakkani ineqarnermut akiliutip
appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut
aalajangiiffigisassaattut siunnersuut. Misissuinkut ineqarnermut akiliutip, illup sananeqarneranut
akiusup, piginnittut aningaasaliissutinit iluanaarutissaasa aammalu ineqarnermut tapiissutit
allanngornerisa imminnut ataqtiginnerat paasinarsisinneqassapput kiisalu aserfallatsaaliinissamut
pilersaarutit attatiinnarneqarnissaat isiginiarneqassalluni. Kiisalu illup illuutit sananeqarneranni naliusup
ingerlaavartumik nalikillilerneqartarnerani pitsaaqutit ajoqutillu misissuinkut qulaajarneqassapput.
Misissuinerup inernerter Inatsisartunut kingusinnerpaamik juli 2022-mi agguaanneqassapput.**

(Inatsisartunut ilaasortaq Erik Jensen, Siumut)

(Siullermeerneqarnera)

Inuit Ataqatigiiit Naleqqallu ineqarnermut akiliutit qaffakkusuppaat. Taama ersaritsigisumik naalakkersuisooqatigiit nalunaarput. Taama ersaritsigisumik nalunaarpoq Ineqarnermut, Attaveqaasersuutinut, Aatsitassarsiornermut, Inatsisit atuutsinneqarnerannut Naligiissitaanermullu Naalakkersuisoq. Tassa piviusoq.

Taamaasillutik Inuit Ataqatigiiit Naleqqallu innuttaasut aningaasartuutaat qaffakkusuppaat. Taassuma kingunerissavaa, innuttaasut ataasiakkaat aningaasaatikinnerulerterat taassumalu kingunerisaanik kiffaanngissusikinnerulerlutik. Tamanna uagut Demokraatinit nuannarinngilarput.

Isumaqpugut, politikkerit Inuit Ataqatigiinnit Naleqqamiillu innuttaasut nassuaattariaqaraat, soog taamaaliornermikkut kiffaanngisusiiarnerlugit. Ineqarnermut, Attaveqaasersuutinut, Aatsitassarsiornermut, Inatsisit atuutsinneqarnerannut Naligiissitaanermullu Naalakkersuisoq isumaqtiginngilarput ineqarnermut akiliutinik qaffaaniarsarimmat, ataaqqivarpulli, iliuutsiminik tunngavilersuinera toqqorluni qimarratiginninnerminngarnik soorlu Inuit Ataqatigiinnit Naleqqamiillu politikkerit allat taamaaliortut.

Uuminnga siunnersuuteqarnermigut Inatsisartunut ilaasortap Erik Jensen-ip pisortat inaataanut attartortittakkanut akiliutip appartinneqarnissaanut periarfissat misissoqquai illut attartortittakkat sananeqarnerannut aki inatsisitigut aaliangersarneqarsimasut minnerpaaffissaanut appartinneratigut.

Demokraatit maluginiarsimavaat, ineqarnermut akiliutit appartinneqarnissaat qineqqusaarnermi partiinit amerlasunuk ilungersunneqarsimasoq. Qinersereernerulli kingorna tassunga tunngasunik saqqummertoqarpiarani. Maannakkulli akerlerluinnaanik pisoqarpoq tassa, Inuit Ataqatigiiit Naleqqallu ineqarnermut akiliutinik qaffaarusulermata.

Demokraatit una piumanerugaluarpaat, uagut akerlianik ukkatarissagippit, innuttaasut amerlanerpaat namminneq illoqalernissaat, taamaaliornerup pisortat illuutai allanut atugassanngortissagaluarlagit. Taassuma kingunerissavaa, ullumikkumiit inuit amerlanerusut pitsaanerusumik ullutsinnullu tulluuttunik ineqlernerat. Sulissutigisariaqartutut isigaarput.



Taamatut oqareerluta, isumaqarpugut, isumassarsiatsialaasoq siunnersuutigineqartutut misissuisoqarnissaa. Misissuinerup piviusunik tunissagaluarmeratigut, ineqarnermut akiliutit pillugit oqallinneq paasinarnerusumik tunngaveqarluni ingerlanneqalerluni.

Taamatut oqaaseqaateqarluta siunnersuutip Sanaartornermut Ataatsimiititaliamut ingerlateqqinnejarnissaa innersuussutigaarput.